

**DAP sangkal fitnah Khairy, pemilihan semula kerana tiada pilihan
Malaysian Insider
Aug 16 , 2013
OLEH MD IZWAN**

DAP menyangkal dakwaan Ketua Pemuda Umno Khairy Jamaluddin kononnya keputusan pemilihan semula Jawatankuasa Eksekutif Pusat (CEC) adalah pengakuan bersalah oleh pimpinan DAP, menegaskan keputusan tersebut diambil kerana parti tiada pilihan lain.

Ketua Whip DAP Anthony Loke (gambar) berkata Khairy sebagai seorang yang terdesak untuk mendapatkan sokongan menjelang pemilihan parti Umno sehingga mengeluarkan kenyataan sedemikian.

"Dakwaan tersebut langsung tidak berasas kerana pucuk pimpinan DAP mengambil keputusan membuat pemilihan semula seperti yang diarahkan oleh RoS disebabkan kita tidak ada pilihan lain.

"Hanya kerana nak memenangi hati ahli-ahli Umno menjelang pemilihan parti, beliau kini sanggup berpolitik sehingga tahap yang begitu rendah sekali," kecam Loke dalam satu kenyataan media hari ini.

Ahli Parlimen Seremban itu juga mendakwa kenyataan Khairy membuktikan selama ini Jabatan Pendaftaran Pertubuhan Malaysia (RoS) mengikut telunjuk Umno bagi memerangkap DAP supaya terbatal pendaftarannya.

"Sekiranya DAP tidak akur kepada arahan RoS, risiko yang perlu ditanggung ialah pembatalan pendaftaran parti.

"Inilah perangkap politik yang dipasang oleh UMNO kerana objektif utama mereka ialah untuk memusnah dan melenyapkan DAP dari arena politik Malaysia," tegas Loke lagi.

Loke juga membidas RoS kerana bersikap sambil lewa dan melambatkan siasatan mereka walaupun DAP secara terbuka mendedahkan kesilapan yang dilakukan mereka pada Januari lalu.

"Masa yang terlalu lama ini bukan disebabkan DAP tetapi kerana RoS mengambil masa lebih 7 bulan untuk membuat siasatan.

"Kami hanya menerima surat rasmi daripada RoS berkenaan arahan membuat pemilihan semula tanpa diberikan sebarang alasan pada 31 Julai 2013!" tambahnya lagi.

Semalam, pengerusi parti Karpal Singh dalam satu kenyataan mengumumkan DAP bersetuju untuk mengadakan pemilihan semula CEC selepas berbulan-bulan kontroversi itu berlarutan.

Semua delegasi CEC 2008-2011 akan berjumpa pada Khamis depan untuk membincangkan persediaan bagi mengadakan pemilihan semula CEC.

Pada 30 Julai lalu, RoS mengarahkan DAP mengadakan pemilihan semula CEC dan memaklumkan ia tidak berpuas hati dengan penjelasan yang diberikan oleh parti itu berhubung isu penyelewengan undi pada pemilihan CEC dan isu manipulasi undi membabitkan 547 perwakilan. - 16 Ogos, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/dap-sangkal-fitnah-khairy-pemilihan-se-mula-kerana-tiada-pilihan>